

Ukolosiya

¹ Bulus, unan kaduran Yesu unuzu nyinnu Kutelle, nin Timoti gwana bit,

² udu kiti nalege na Kutelle na fere nani, alenge na ina ni nibinai mine kitin Yesu, ale na idi Nkolosiya. Ubolu Kutelle nin lisosin limang nnuzu Kutelle Ucif bit.

³ Tidinin liburi liboo kiti Kutelle, Ufin Yesu Kristi, ti din suu minu nlira kokome kubi.

⁴ Tina lanza uyinu mine sa uyenu nanya Yesu Kristi, nin suu kiti na lena Kutelle nafere nani.

⁵ Bara uni kibinai nghinua, nin ciu nanyi mine kiti nimong ile idi kitene kan, anughe wa cizin ulanzu ubelen nni nibinai nine unuzu ligbulang kidagen, ullirun nlai.

⁶ Ulenge na una dak kitimine, nafo ulenge na adin macu, akunjo vat inye, nafo na anughe ditutung, uyire liyiru longo na iwa lanza, ida yinno nkunekune Kutelle nanya kidegen mye.

⁷ Udi nafo na iwa lanza kitin Abafras, udon licin bite ule na adi kucin kulau ku Yesu kitimine.

⁸ Ame ule na ana puun nari usu mine nanya Nfip milau.

⁹ Bara ule usuwe unuzu liyiri longo na tiwa lanza ubellen minu nati sunan nlirang nin tirinu nworo uyinnu kullo munu nin se nyinnunu nanya nn Ufip milau.

¹⁰ Anit din nliran nworo ucin mine cinu dert, nin vat, nafo na iba macu nanya liddle licine nin nkunju mine nanya nyinu Kutelle.

¹¹ Tidin nliran nworo vat nile imong na idin suwe, nanya likara nzinu mye, una dorfino nin ghinu nanya ncin nibinai mine nin nayi ashau

¹² Tidin nlira nworo ule imone yita iba zazinu Ucif bite nin nayi aboo ulenge na atanari tinanin nbatina ulii ngadu nanya anan yinu sa uyenu nanya uhaske.

¹³ Ana bolu nari nanya likara nsirti, anin kpiliya nari udu kitetne tigo Ngono me nayi mye.

¹⁴ Nanya Ngono mere tina se utucu nin nshawu kulapi.

¹⁵ Gone amere tina se utucu nin shawu na lapi bite

¹⁶ Bara kitimere iwa ke imong vat ilengene na idi kitene kani nin nilenge na idi inye vat, ulenge na idin yenju nin nilenge nsalin nyenju, sa kuteet tigo, sa uminu kipin, sa tigo vat nimon amere wa kee bara litime.

¹⁷ Ame di ubun nin ko iyang, nanya mere ko iyang di kiti kirum.

¹⁸ Amere liti nanit mye, kidowo mye amere unan cizinu likara, kumat ncizinu nanya na nan nkul, adinnin kitin ncizunu nanya nimon vat.

¹⁹ Nanere bara una poo Kutelle liburi a kpiliya, nworo vat nkullu nimon nan so kitimye.

²⁰ Anan keele imon vat unuzu ngono mye udu kiti mye, Kutelle wa su nani kubi na awa keele ko iyang unuzu mmi Ngono mye na iwa gutun kitene nbanu kutea, sa imon inyi sa kitene kan.

²¹ Au anung wang ngon kubi, iwadi amara kitin Kutelle, iwa di anan nivira mye nanya nibinai nin katwa kananzang.

²² Udak nene Kutelle wa munu minu kitene

kidowo Yesu kin nkul, ankpa min annit alau, anan sali nimong tizogo anan sali nnanu lidu nbun mye.

²³ Andi tutun anughe ashono ati nanya nyinu sa uyenu anan liyisi nari gagang, na ana nworu iba kalu nani kiti katwa Kutelle na ina latiza ulenge na inasu uwa azi nin vat makeke na udi kadas, meny tutun na ina tii nso unan katuwa meng Bulus.

²⁴ Idinin liburi liboo nin nniu nighe bara anughe, nkulun ile imonghe na idarni nin lanzu nkul nama kidowo Yesu na unere ana dortu mye.

²⁵ Nwwasu katwa kutyi nliran dert nin katwa kutelle ka na iwa nii bara anughe uliru Kutelle nan kullo.

²⁶ Kidegen ka na kiwa nyeshin nin nakus piit udu kuji kidung na kudi ncinu, bara nene ina puun kti nanit alau mye.

²⁷ Anughere ale na Kutelle wa yinin a belle nani ko iyagari use nkanang micine mongo na midi nanya nanit. Ame Kristi na adi nanya mine amere uciu kibinai ngongong mine.

²⁸ Amere ulele na tidin su nin lisa mye, tidin gbaru ko gha ku, ti dursuzo ko gha ku nin vat nyiru unan so dert kitin Yesu.

²⁹ Nenere ndi katuwa nin nfo kidowo bara katwa mye ka na atii ndi suwe nin likaraa.

2

¹ Bara meng dinin su anugheiyinin ngbardang nnono mongo na dimun bara anughe nan nalenghe na idi Nlaudikiya nin ngbardan na isa yene umuro nighe nanya kidowo ba.

² Nworu nibinai mine basennagang, nanya nworu ida vat nimon nacara na idin dasu kiti ncau kibinai nin nyinnu nimong linyeshin unere Kristi.

³ Vat najiya linyeshin nyiru nin nyinnu udi kiti mye.

⁴ Nna belin munu nani bara umong wa rusuzu munu nin nliru kinu.

⁵ Nin nani na ndi nanghinu nanya kidowo ba ndi nanghjinu nnya Nfip milau ndin nin liburi liboo nyene imon icine a likara mine nanya nyinu sa uyenu nanya Kristi.

⁶ Cinan nanyan Kristi Yesu Uciffe libau lirim inan sereghe.

⁷ Yisinin nin likara nanya mye, tutunon litino nanya mye, Yisinin nanya nyinu sa uyenu ulena iwa durso minu imonnu nin ngodiya.

⁸ Yenen na umong nwa minu bara uyiru mye un karusuzo ba, ule na udi unit usyrne ulenge na udin cinu nin kulapi ninyulele unin na un Kristi ba.

⁹ Bara vat ukullu nke Kutelle sosin nanya kidowo mye.

¹⁰ Nanya mye ulengana adi iti nvat ncin nin likara fere nso ukulu ne vat.

¹¹ Nanya myere kutelle wa kala nani kucuri na imusin kalu kucuri nacra nanit ba, bara ukalukidowo nin finawa kulapi, nanya nkalu kucuri Kristi.

¹² Iwa kasu minu nanya su ubabtisma. Nin yinu sa uyenu inani wa fita nin ghe nanya likara Kutelle, ulena ana fiyaghe kiti nanam nkul.

¹³ Nin kubi na iwa ku nanya nalapi mine nin nanya nsalin kalu kucuri kidowo, amini wwati

minu ise ulai ligowenanghe nin nshawu nin nalapi mine vat.

¹⁴ Amini wa wese inyerte na iwa cio nrewe bara arike, nin nbunu ndoka, aamini wa kala vat kite na iwa banaghe kutca.

¹⁵ Amini wa kala anan tigo nan na nakara a puuno nani fong, a dofino ninghinu nanya nse nlii nbun bara na iwa banaghe kutca.

¹⁶ Bara nani na umong nwa wucu kidegen kiti mine nbelle kileo nin nsonu sa ubuki npui upese, nin kitene nari na sabbar.

¹⁷ Ilele vat inshin nimon ile na iba dakari, bara icineb Kristi ari.

¹⁸ Na umong nwa bolu minu uduk mine bara usu mye unteltunu liti kinunanya ntumolunu na nan kadura Kutelle imusin nnit une. Asa amuzo nin nimon ile na ayene, aso unan nfo figiri hem nani nanya nkpilizun kidowo.

¹⁹ Na ame myin un Kristi kuba na amere di nnuzu kidowo amini myin ligowe kitene limunun kidowo kani di nkunju nafa na Kutelle nati kinin ki kunno.

²⁰ Adi una kuu nin Kristi unuzu na dadu kulapi ani yanghari taa inalitife udu uye:

²¹ Na uwa myin ba, sa ulelee basa ududowa?

²² Ulele udokari nin dursuzu nanit, kitene nimon vat na iba nanu sa katwa.

²³ Ulenge usu tidokoke ti di jijin adini liti me nin nonku liti aninu kidowo, Bara na idinin na ukan nimon ba nbelele kidowo.

3

¹ Andi Kutelle wa fiu munu nin Kristi Piziran imon kitene kani, ki nkanga na Kristi sosin ku

ncara ulime un Kutelle.

² Kpilizan Kitene nimon ile na idi kitene kani na kitene nile na idi inye ba.

³ Bara una icu, ulaife nyanshin kitin Kristi nya Kutelle.

⁴ Kubin dak Kristi ulai fe iwa puun umini ba kuru ipuunfi nin Kristi nanya ngongon me.

⁵ Mollon, bara nani, iiti nibinai nalapi mine inye-kulapi zina, usalin lau, ntuturi, uciu kibinai nimon, inazan, nkot, unere udurtu ncil.

⁶ Udi barananere tinanayi Kutelle wa dak kiti nono salin durtu nliru.

⁷ Udi nanya nile imonere anung wang wandi ncinu kubi na iwa sosin nanghinu.

⁸ Bara nene nyan piit kitene nile imone -tinana ayi, ayi ananzan, unityi unanzan, tizogo nin nimon incing, na iwa nuzu nanya tinu mine b.

⁹ Na iwa ati mine kinu ba, bara ina nutun minu kitin nit ukuse nin nadadume.

¹⁰ Ina ni nati annit apese ilenge na ina kusunannya nyiru kuyeli mye, kuyeli nlenge na ana kele minu apese.

¹¹ Nanya nle uyiruwe na ku Yahudawe sa ku Hiliniyawwe duku ba sa unan kalu kucuru sa unan salin nkale asa unit uhem nnanndiru litii, kucin ilenge na adi licin ba bara nani Kristi amere imon vat nanya nimon vat.

¹² Taan atimine nafo alenge na Kutelle na fere naninanya nlau nin su linwana kibinai kunekune ayi ashau unonku kibinai.

¹³ Tizan nibinai nishau nin linwana, ishawa kulapi linwana asa umon dinin tinanzan nin nmong shawan nafo na Cikilare na shawa nin

nalapi mine.

¹⁴ Kitene nile imone vat yitan nin unnere ukuluna nimon vat.

¹⁵ Na lisosin limang Kristi suo nanya nibinai mine nanya lisosin limang lolere iwa yicila minu mu kidowo kirum, son anangodiya.

¹⁶ Na liggbulang Kristi suo nanya mine gbar-dang vat nin kujinjin, dursuzu inizu atimine ushawara nin naleli Nruh, suun alalin godiya nanya nibinai mine vat udu kiti Kutelle.

¹⁷ Vat nile imon na uba su-nanya ligbulang sa katwa-suun vat nanya lissa Ncikilari Yesu nin godiya kiti Kutelle udu Ucif nanya Yesu.

¹⁸ Awani toltunon ati mine kiti nales mineile imon na iciuari une kiti Kutelle.

¹⁹ Anung ales taan usu na wani mine, na iwa naniza ayi nin ghinu ba

²⁰ Non, dorto anan macu mine nanya nimon vat ule imon nyinuari kitin Chikilari.

²¹ Anung Acif, na iwa jottu ayi nono mine nin liru ba, bara nibinai mine wati camcam.

²² Anung acin, durton an cikilari mine nidowo nanya nimon vat, na bara uyenju nizi nanit ba, bara nin kibinai kirum kin fiu Ncikilari.

²³ Vat ni lemong na idinsu, suun nin kibinai krum nafo udu Ncif na nafo udu nanit ba

²⁴ Iyiru iba seru kiti Ncikilari ugadu ulenge na udi un minere, idin suu Ncikilari Kristi katwa.

²⁵ Ame ulenge adin suu imon inanzang iba tunughe nin nimong inanzang ile na adin suu, na iba tunughe mun ba.

4

¹ An cinilari naan acin mine ile mon na idin

dert nin gegeme anung yiru tutun idinin cikilari kitene kan.

² Tunan nanyan nliran ko kuyeme kubi, son nin yiru nanya nlira nin godiya.

³ Suun nlira ligowe bara arike tutun, nworokutelle nan puno libau tibelle ligbulang imon Kristi na inyesin, bara nanere ndi licin bara inung.

⁴ Suun nlira inan belle nafo na inati ku nbelli.

⁵ Cinan nanya jinjin kupopo nale na ucin nda, suun katw nin kubi mine jinjin.

⁶ Na ulai mine so shau ko kome kubi unin mang nin ntoh, yinno inda na iba kawu ko ghak.

⁷ Tikikus ba bellu minu ko iyang litinin, amegwanari kin su kucin kugi, nanya katwa, udon licin nanya Ncikilari.

⁸ Mere nin liti nighe ina tighe kiti mine, inane, inan yinno nari inan taa lkari kibinai.

⁹ Ligowe nin Onismus, gwa na kigip unan su, uba ti munu iyyinin vat imon ile na idin su kikane.

¹⁰ Aristikus din nlisu minu -udondon licin nighe nin Markus usau gwana Barnabas, kiti mere idin sesu kadura likara, asa adah sereghe"

¹¹ Yesu ulena idin yicughe ustus, alele cas anan kalu kucuru inughere adon katwa nighe udu kipin tigo Kutelle. Ina suo anan tizie likara kibinai

¹² Abafaras di nlisu minu, ame umonghari nanya mine kucin Yesu Kristi adin nnonno bara anung nanya nliran, inan yisina nin likara nnufi Kutelle vat.

¹³ Bara meng nso iyizi inba mye, adi katwa kaang bara anughe, baraalenge na idi Nlaudikiya

ni nanya Hiyarapolis

¹⁴ Luka, gwa na nayi nigh unan nizu tikankan, nin Dimas din lisu min.

¹⁵ Lisson linwana Laudikiya, a Ninfas, nin kutii nlira naku di nanya kilari mye.

¹⁶ Iwa belu minu ile ma nyerte ubelu ma nyerta unin nanya na nan dortu Kutelle Nlaudikiya, anung wang Belen manyerte un nanan Nlaudikiya

¹⁷ Woro Akiribus ku, "yene katwa Kutelle na una seru nanya Ncikilari ukulun kanin."

¹⁸ Ile ilipe idi nanya nacara nighghari Bulus, lizinon nin ninyeg nighe. Ubolu Kutelle suo nan ghinu.

Amo New Testament

The New Testament in the Amo language of Nigeria

copyright © 2020 Door43 World Missions Community

Language: Timap (Amo)

Translation by: AFenlason, ALHASSAN SUDA, Chrispher Ishaya, James, Kawusu David, Pungs Makarios, Zephaniah A. Isau, tab04-nig, tab12-nig

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-07-06

PDF generated using Haiola and XeLaTeX on 19 Dec 2025 from source files dated 12 Dec 2025

cb0040a9-2597-55c7-975b-461d5a397911